

INUIT ATAQATIGIIT INATSISARTUNI



UPA2023/53

25. april 2023

Mariia Simonsen

Uunga siunnersuut: Meeqqat illersuisuat aamma Meeqqat pillugit Siunnersuisoqatigiit pillugit Inatsisartut inatsisaata allangortinneqarneranut, Inuit Innarluutillit illersuisuat pillugu Inatsisartut inatsisaata allangortinneqarneranut, Utoqqaat illersuisuat pillugu Inatsisartut inatsisaata allangortinneqarneranut, Isumaginninnermik suliasaqarfimmi pissaanermik atuineq pillugu Inatsisartut inatsisaata allangortinneqarneranut kiisalu Inuit Pisinnaatitaaffii pillugit Siunnersuisoqatigiit pillugit Inatsisartut inatsisaata allangortinneqarneranut Inatsisartut inatsisaat

(Meeqqanut, Inuusuttunut, Ilaqutariinnut Peqqissutsimullu Naalakkersuisoq)

Oqaaseqaat:

Meeqqat, inuit innarluutillit utoqqaallu illersuisuisuinik taaguutit allangortinneqartussanngornerat Inuit Ataqatigiinni ilassilluarparput. Meeqqat, innarluutillit utoqqaallu maanna oqaaseqartartoqalissapput taaguutilinnik meeqqat pillugit oqaaseqartartoq, inuit innarluutillit pillugit oqaaseqartartoq kiisalu utoqqaat pillugit oqaaseqartartoq. Illersuisunik taaguuteqarsimasut maanna naleqqunnerusumik taaguuserneqartussanngornerat Oqaasiliortut aalajangiinerannik tunngaveqarpoq. Oqaasiliortut aalajangiinerminni tunngavilersutigaat oqaaseqartartoq kisimiinnani pillugit-mik ilanearluni atuuffinnut pineqartunut tulluarnepaasoq, tassami pineqartut pillugit, taakkunungalu ajunnginnerpaaq anguniarlugu oqaaseqartartut sulisussaammata.

INUIT ATAQATIGIIT INATSIARTUNI



Meeqqat, inuit innarluutillit utoqqaallu oqaaseqartartuat kisimiissagaluarpat una pineqassaaq taakku tamaasa sinnerlugit oqaaseqartartuussaasut, pillugilli ilanngunneratigut taakku pillugit oqaaseqarneq pineqarpoq – sinnernagit, illersornagit kisianni atugaat pillugit.

Inatsisit nassuiaataasalu oqaasertaanni taamaattoq sukku tamaana iluarsisassaqarpoq, kissaatigaarpullugu tamakku iluarsineqassasut.

Assersuutigalugu inuit innarluutillit utoqqaallu pillugit oqaaseqartartut allaffii illersuisoqarfinnik sulii taagorneqarput, uffa taaguut illersuisoq atorunnaarsinneqaraluartoq. Aamma marlussunnik iluarsisassaqarpoq assersuutigalugu meeqqat pillugit oqaaseqartartoq pillugu inatsisip ½-iisa arfineq-pingajuanni allassimammat: meeqqat pillugit oqaaseqartartuata il.il., imaattussaalluni meeqqat pillugit oqaaseqartartup.

Tamakku tunngavilersuutigalugit naalakkersuisut inatsisinik allannguutissatut siunnersuutaat akuersissutigaaavut.